

Malueng ako Jems i wat i Jems Ritetong nge a Jems

Ava Jems aka i wat malueng ake ini a Jisas iteinnga. Na ini mun i lotu a mukalinga aka a Jerusalem. (Pakeke 15:13) Na i wat malueng ake a toko lemioonga pelie aka or ini Judare. (1:1; 2:1) Na ur aolonga aka i voth a malueng ake lemi i vene: Toko e avele i pavurvur aka aro i ri inga aka ve, ilemio nge a Krais. Avele, ile vothung sivenga aro i pathengal tokokoere aka ve, ile lemioong aken i nunganga. Na aro ve vothung sivenga e avele i voth a ile mimiong, aken ile lemioong aken ini ur polpolnga. (2:26) Na tongporumong na matheong aka aro i velpoltun it, kene i pathengal mun it aka ve, ler lemioong aken i nunganga. (1:2-18) Aro te mothong tova te nongpol polpol Panongpolong Sivenga, aveto aro te panes i. (1:19-27) Jems i ri pompom nge vothung aka toko lemioongare aro o oma i, ranga ve aka aro te naktet ler riong, (3:1-12) naro te el mire aka ini Pen a Urvet anga, (3:13-18) naro te paruru sivenger nge vothung sivenga omanga, (4:1-17) aro vene mo aro te mit nge riong. (5:1-11) Na Jems ile patoraling i ranga ve ini a Jisas ile patoraling aka i voth nge a Matiu 5-7.

**Aro te mit engeng nge
tongporumong, maken aro God
ilemi sivenga nge it**

(Vonge 1:1–1:18)

¹ Tho a Jems, aka ini a God na Toko Pomnga a Jisas Krais ole umonga.

Na tho wat malueng ake a thomu toko na seng alavusnga aka o voth nge Israelre ole net or mule pa omole pothoi or aini, na o voth mela nge lomu rem tepun, ma o vra a pen elonga ake ru a ulue.

Na tho pasungalu mun lek nang sivenga a thomu alavusnga nge.

Ine tongporumong ini ur aka aro i pavengveng it.

² Titeikre, aro lomumu i sivenga rintet tova ve tongporumong rel relnga i velpoltun thomu, ³ eneke lomumu mire aka ve, aro ve lomu lemioong i mit engeng nge tongporumong areken, aken i pathengal aka lomu lemioong aken i nunganga, maken thomu o pavurvur aro o mit engeng evelelnga. ⁴ Maken aro thomu o mit engeng evelelnga mo aro i oma thomu mo aro thomu o voth ini tokokoe areko o motu rintet nge vothung riringa, naro thomu o oror nge vothung sivenga e avele.

Aro ve toko e i oror nge lemi rumong sivenga, aro i nong a God nge mo i sungu i a i nge.

⁵ Na aro ve omu e i oror nge lemi rumong sivenga, aken aro i nong a God nge aka ini God sungonga, maken aro i sungu inga a i nge, eneke God i sungu lemi rumong sivenga aken a or alavusnga aka o nong i a i nge, na ikei palil or nge avele. ⁶ Na aro ve wong nong, aro lomumo ve, God kene i sivenga, naro i sungu i a ong nge, na mothong tova lomum aini nge, eneke toko aka

i nong na ilemi venen aken, i ranga ve ini thev le lolikong ako sa thuu thua i ma i ngo pis avele. ⁷ Na toko aka i venen aken i mothong tova ilemi ve, Toko Pomnga aro i sungu ur e a i nge. Aken aro avele. ⁸ Eneke ilemi omoletet inga a God nge avele, na ilemi ngo pis mun avele nge ile omaing elonga.

Areko ole ur elonga avele na areko ole ur elonga pom o vur e pel inga a God itheki.

⁹ Toko lemioonga areko ole ur elonga avele aro olemi ngo senu, eneke God i paesa oion roro tomo nge a Krais lale. ¹⁰ Na areko ole ur elonga pom aro olemi ngo senu nge aka o ranga ve ini toko vulutnga a God itheki. Eneke ole mimiong i lollo avele, ranga ve ini kolkolung punpolnga aka i punpola inga, lamako i movur werer mun. ¹¹ Na riong aken i nunganga, eneke nang i ina me, ma ivelvelnga i totun kolkolung punpolnga aken, ma i molit, mako ipunpolnga i matu, na ile sivengaing aka te thopol i nge, kene i kerenga. Na toko le urngare kene o vene re aken, aro o penthal leltun ole ur elonga alavusnga aka o mostun omanga nge ole mimiong.

God i oma inga vothung sivenga nge it, na i tongporum it nge vothung kerenga omanga avele.

¹² Sapase toko aka i mit engeng nge tongporumong, eneke aro ve i mit engeng na ile mong tongporumong areken, aro i el mimiong aka aro ile vusonga avele, aken ini ile sungong yet aka God i kin ile riong nomenga lale ve aro i sungu i nge areko oa sagu i.

¹³ Aro ve tongporumong e i velpol a toko e nge ve aro i oma vothung kerenga, i mothong tova i ri ve, “Tongporumong ake i es a God nge me.” Eneke ur e avele i pavurvur ako aro i tongporum a God ve aro i oma vothung kerenga. Na e mun e ako God i tongporum toko nge vothung kerenga omanga avele. ¹⁴ Aveto tongporumong i velpol a toko omole omole nge vene: Lemi rumong kerenga i mita a ilemi, ma ilemi altetpot nge omanga, mako i oma i. ¹⁵ Maken aro ve lemi rumong kerenga aken i tea a toko ilemi, aro i papel vothung kerengare. Na aro ve vothung kerenga areken i motu aro i papel rinong.

¹⁶ Titeik areko ok sagu thomu, o mothong tova o nongal riong ako o ri ve, “God i sung tongporumong a tokokoere nge” aken aro i patelek thomu.

¹⁷ Na sungong alavusnga areko o sivenga na o riri, kene o esu a Pen a Urvet me, na o esu a God nge me ako i pamens pen lalanga alavusnga aka sepsa. Na ini a God aka i eksing avele, na i eksing mun ranga ve ini mlil aka i eksingu eksinga, kene avele. ¹⁸ Na nge isivenga ilemi vet i pavelpol ol it mo ini itutunre nge ile riong nunganga aka i sungu i a it nge. Na i oma it vene aken mo aro te mukal nge ur alavusnga aka i pamenu ir oelwerernga mo ini ile ol.

Aro ve ler lemioong i nunganga nge a God, aro te oma mun vothung sivenga

(Vonge 1:19–5:6)

Aro te panes riong, na te mothong tova te

nongpol polpol i.

¹⁹ Titeik areko ok sagu thomu, aro lomumu rum senu nge lek riong ake. Aro thomu o paviri nge ako aro o ta telngomu, na o mothong tova o ases virialpot lomu riong, naro o mothong tova lomumu kling viri viri. ²⁰ Eneke toko ile lemi klingong i pavurvur avele aka aro i pavelpol vothung vengvenga aka God i sis ve aro te oma i. ²¹ Maken aro thomu o modop lomu vothung akromnga tomo nge ni silalpeling aka thomu pulua o oma i. Na o paesu thomu ruru, na o elo riong aka God i o i lale a opomu lemi, eneke ini riong aka i pavurvur aro i pamimi thomu.

²² Maken aro thomu o nongal riong aken. Na aro ve thomu o nongpol inga riong na o panes i avele, aken kene lomu apaltet sivengomu, ²³ eneke toko e aka i nongpol inga riong na i panes i avele, kene i ranga ve ini toko aka i thepol isivenga itheki lemi nge thealuonga. ²⁴ Ma i thepol itheki lemi ma vus, ma i es na a ur e avele, nako ilemi simikal werer mun itheki lemi aken kene i vava ol. ²⁵ Aveto toko aka i thepol senu patorong aka i alarorol, aka i pavthopot tokokoere, na i pesrou nge omanga avele, na ilemi simikal ur aka i nongpol i avele, aveto i oma ir, aken kene God aro i pamen senu toko aken nge ile omaing alavusnga.

²⁶ Aro ve toko ilemi ve i panes senu lotu, aveto i naktet senu ile muma avele, aken kene ile apaltet isivenga, na ile ni sisiong nge lotu panesnga, aken kene ini ur polpolnga. ²⁷ Na lotuong panesnga aka i riri rintet, na i nunganga a Titemer a God itheki kene i vene: Aro te opoal patungtungere

tomo nge basbasuere nge ole matheong. Na e mun e ako aro te naktet ler mimiong, aro vene mo vothung ulue anga i pamatu it.

2

Ler vothung nge tokokoere aro i vur e pel inga.

¹ Titeikre, lomumuo nge ar Pomnga a Jisas Krais na o papomnga rintet i. Na o mothong tova o paroro toko pelie na o paruru pelie. ² Na aro ve toko le urnga e ako i teun malmaling ako iolonga roro na i es me mo i lotu tomo nge thomu, na toko le ur avelenga mun e ako i teun ur minriranga i eso mun me, ³ na aro ve thomu o naktet senu toko ako ia malmaling i sivenga rintet mo aro o ria i ve, “Aro wong menu nge menonga sivenga ake.” Na aro ve thomu o ria toko le ur avelenga aken ve, “Aro wong mit inga ako la,” eve “Aro wong menu inga a ulue totho a evek tepun.” ⁴ Na aro ve thomu o oma vothung ako i vene aken, akennga lomu vothung nge tokokoere i vur e pel avele, ma thomu o omreu sivengomu nge lomu lemi rumong kerenga aken.

⁵ Titeik areko ok sagu thomu, aro thomu o nongpol! Lomumu mire ako God i ateal toko le ur avelengare ake ru a ulue, ve aro o velpol ranga ve ini toko le urnga nge ole lemioong, na i ateal mun or ve aro o eso a God ile menong e nepes ako i kin ile riong nomenga lale ve aro i sungu i nge areko oa sagu i. ⁶ Aveto thomu o paruru toko le ur avelenga areken. Aveto ini toko le urnga areko o sung matheong a thomu nge ma o pamit thomu nge riong! ⁷ Na ini toko le urnga mun inga areko

o ri tangatun nge a Toko Pomnga iion sivenga ako thomu ini ile.

⁸ Aveto i sivenga tova ve thomu o panes patorong avera ako i voth a God ile erere nge ako i ri ve,

“Aro om sagu toko alavusnga
ranga ve ako om sagu mun sivengom.” *Wok
Pris 19:18*

⁹ Aveto aro ve thomu o paroro toko pelie, na o paruru pelie, akennga thomu o matu nge vothung kerenga lale, na Moses ile patorong i teltun omu ako thomu ini patorong avsangare. ¹⁰ Na i vene ake, eneke toko e ako i panes patorong alavusnga, ave i avsa inga patorong omole inga, aken i matu lale ranga ve ako i avsa patorong alavusnga lale. ¹¹ Na lek riong aken i nunganga, eneke God ako i ri ve,

“Thomu o mothong tova o ngo tomo nge areko or
ini ewomu avele.” *Lo 5:18*

I ri mun ve,
“O mothong tova o so rin polpol toko.” *Lo 5:17*

Na aro ve wong ngo tomo nge toko relnga iewo avele, aveto wong so rin polpol toko, akennga wong avsa patorong lale.

¹² Na i sivenga ako aro thomu o naktet lomu vothung na lomu riong alavusnga, eneke aro thomu o mit nge riong mo aro God i olal i a thomu nge, nge ako thomu o panes patorong ako i pavthopot thomu. ¹³ Naro thomu o oma venen aken, eneke toko e ako i themosal tokokoere avele, panen tova i mit nge riong, God aro i themosal mun i avele, naro i sung inga paomelaling

a i nge, aveto themosaling a vothung, kene i pavthopot toko nge a God ile paomelaling.

Aro ve lemioong i es tomo nge vothung sivenga omanga avele, aken ini ur polpolnga.

¹⁴ Titeikre, aro i vava, aro ve toko e i ri ve, “Lek lemioong i voth,” aveto i oma vothung sivenga avele, ile lemioong aken i pavurvur aro i pamimi ol i eve avele? ¹⁵ Aro ve titeir eve lulur lemioonga e i oror nge teunong na aning, ¹⁶ na aro ve omu e i ria i ve, “Nak lom esong ti la. Naro mesi pun ong avele, naro num merir mun avele.” Aveto i sungu ur areko aro i opoal ile mimiong avele, aro ile riong aken aro i opoal i vava? ¹⁷ Na i vene mun nge lemioong, aro ve toko e i ri ve ile lemioong i voth, aveto ile vothung i panes ile lemioong avele, nge vothung sivenga omanga, aken kene ile lemioong aken i rin lale.

¹⁸ Na ava toko e aro i ri vene, “Toko e ile lemioong i voth, na toko mun e ile vothung sivenga i voth.”

Aro tho olal riong aken ve, “Aro ve lomumo inga na wong oma vothung sivenga mun avele, aken aro lemik mire ol nge lom lemioong vava? Aveto lek vothung sivenga aro i pathengal wong ako lek lemioong i nunganga.” ¹⁹ Na lomumo ve God omole inga ako i voth. Ur mun e avele, eneke tamata kerengare or mun olemio mun venen aken, ma saluk or.

²⁰ Wong ini ngongong! Wong sis ve aro tho patheng vengveng i a ong nge ako ve, aro ve lom lemioong inga i voth, na wong oma vothung sivenga mun avele, aken lom lemioong aken kene

ini ur polpolnga inga? ²¹ Na i vava nge titevir a Abraham ako i voth nomenga, e? I nongal a God, nge ako i kin itun a Aisak ma i ronga i a sungong a lekleka nge mo ini ile sungong.* Na God i thopol ile omaing aken, mako i apet i ve ini toko vengvenga. ²² Aro lomum mire senu aka, Abraham ile lemioong i um tomo nge ile vothung sivenga. Na ile vothung aken i pathengal i aka ve, ile lemioong aken i nunganga. ²³ Ma i velpol ranga ve aka God ile erere i ri nge, aka i ri vene, “Abraham ilemio nge a God, mako God i apet i ve ini toko vengvenga.” *Stat 15:6*

Mako o apet a Abraham ini a God ithanga. ²⁴ Maken aro lemir mire senu aka ve, God i apet toko ini toko vengvenga nge ile vothung sivenga omanga, na nge ile lemioong aka i voth polpol, kene avele.

²⁵ Na i vava nge seng sovengalo anga aka ini a Rahap? I vene mun re aka God i apet i ve ini seng vengvenga nge ile vothung sivenga aka i nongpoo Israelre ole pen rengare, ma i opoal or mo aro o lo ol nge sovengalo relnга e. ²⁶ Maken aro ve toko aka ini peti inga, na ion i voth avele, aken i rin lale. Na i ranga ve mun nge lemioong, aro ve lemioong inga, na vothung sivenga i voth tomo nge avele, aken i rin mun lale.

3

Aro te naktet senu wor nge riong.

* **2:21:** O thepol a Stat 22:9-12.

¹ Titeikre, aro thomu pulua o mothong tova o velpol ini pamirealongare, eneke lomumu mire ako ve, them areko ini pamirealongare, God aro i avrum lemem vothung, na ile avrumong aken aro i aolo leltun toko polpolngare ole. ² Na tho ri vene aken, eneke it alavusnga te matu nge vothung rel relnga pelie. Aveto aro ve toko e i naktet ile riong alavusnga, aken ini toko vengvenga ako i pavurvur aro i naktet mun ile vothung alavusnga.

³ Na aro ve te sis ve hos aro i panes inga ako ini lemir, aro te kino we a iwo, na nge sovengalo aken te pavurvur ako aro te paes ilopat alavusnga nge pen kathnga ako te sis ve aro te es nge la.

⁴ Naro lomumu rum mun nge imot, ini ur ako i aolonga rintet, na thue engenga inga ako aro i patho i a thev stha, aveto sauthonga ako i patho vengveng imot ini ur ako i tunti. Aveto imot pathonga i pavurvur ako aro i paes imot aken nge wop kathnga ako i sis ve aro i es nge. ⁵ Na i ranga ve ini mun i nge ler mumu, ini nir peti epee ako i tunti, aveto i pavurvur ako aro i risea nge ur aoliloenga. Naro lomumu rum mun won mikeri inga ako i pavurvur ako aro i ongris kleng epee aolonga e.

⁶ Na ler mumu i ranga ve ini won sesenga. Na i ranga ve ako vothung ulue anga elonga i voth a i nge. Na ini nir peti epee omole mun e ako, aveto i pakerenga ler mimiong alavusnga ranga ve ini won sesenga ako i ongtun kleng alavusnga. Na won sesenga aken kene Satan i papola i.

⁷ Na mekerem elonga ako ranga ve ini men, na mekerem areko o re nge oopo, na silangre, or alavusnga tokokoere o pavurvur ako aro o

papolul or, ⁸ aveto toko e avele i pavurvur aro i oma venen aken nge ile muma. Evelelnga i sesa ses nge riong kerenga omanga, na i ranga ve ini pilimo ako iwo ei i kerenga.

⁹ Na nge ler muma te oma riong ako te paesa Toko Pomnga iion nge, aka ini Titemer, na nge ler muma mun kene te ri tangatun nge tokokoere, na or ini areko God i pamen or nge isivenga ia sei.

¹⁰ Na riseaing a riong tomo nge ri tangatunong a riong, or alaini o espot inga aka a pen omole aka ini wor. Titeikre, i mothong tova i venen aken. ¹¹ Na nge thei povovloainga omole kene i pavurvur aro thei sivenga tomo nge thei welwelngga aro o lel tomopot nge me avele. ¹² Titeikre, i pavurvur aka aro vero aro i mon mo i pavelpol vuvi? Eve ine wain aro i mon mo i pavelpol vero? Avele! Na i pavurvur mun aka aro thei sivenga na thei kerenga aro o lel tomopot nge thei povovloainga omole, kene avele.

Mire sivenga aka i esu a God nge me.

¹³ Anga a thomu nge ilemi ve ini toko aka ile lemi rumong i sivenga ma ile mire i nine, e? I sivenga aka toko aken aro i pathengalpot ile omaing a tokokoere nge, aka ranga ve ini ile vothung sivenga aka i oma i, nge aka i paruru isivenga, na i panes lemi rumong sivenga.

¹⁴ Aveto aro ve opom lemi i vual nge thesealing nge mukaling a menong, na nge riong welwelngga, na nge sivengom thealngom, mothong tova ong pasea sivengom nge, aro vene mo lom apaltet nge a God ile riong nunganga. ¹⁵ Na vothung aka i venen aken, aka thomu o apet i ve ini lemi

rumong sivenga, kene i esu a Pen a Urvet me avele, ini ulue anga vet aken, na Oni Riringa i pavelpol i avele, ini tamata kerenga areko o pavelpol i. ¹⁶ Tho ri venen aken, eneke pen ako vothung nge thesealing nge mukaling a menong, na sivengom thealngom o voth nge, kene men kerereong na vothung kerenga elonga o voth mun nge.

¹⁷ Aveto tokokoe areko o el lemi rumong sivenga ako i esu a Pen a Urvet me, aro o oma vothung ako i vene: Vothung ako i mukal nge vothung elonga i vene: Aro lemir omoletet inga nge vothung riringa omanga. Naro te men senu tomo nge tokokoere, naro te panes mosing a vothung, naro te nongal riong, naro te vual nge themosaling ako aro i pavelpol imonnga sivenga, naro te paruru toko pelie na te paroro pelie, kene avele, naro te panes neoong a vothung avele. ¹⁸ Areko o men senu, na o engeng nge men senupeling, o pavelpol vothung vengvenga nge tokokoere.

4

Toko aka ia sagu vothung ulue anga ini a God ile ngarang.

¹ Na ur nekenga i patea punpeleng nge riong, na volpeleng aka ru a thomu nge, e? Aken ini lemi rumong kerenga aka i virpol ma i pun tomo pel nge lemi rumong sivenga. ² Na thomu o sis rintet ur puluanga elnga, aveto thomu o el vet i avele. Na thomu o so rin toko, na o theseal ole ur, aveto thomu o pavurvur nge ur aken elnga avele. Na thomu o vol pel na o patea sisoin nge ur pelie

elnga, aveto thomu o el i avele, eneke thomu o nong a God nge avele. ³ Na nge ako thomu o nong nge ur e, thomu o el vet i avele, eneke lomumu i sivenga nge avele, aka ranga ve thomu o sis ve aro o papomnga inga lomu lemi rumong kerenga nge.

⁴ Thomu o mothong a God lale, ranga ve ini seng aka i mothong iewo, na i ngo pelekpol tomo nge toko elonga. Lomumu mire senu ol aka ve, toko aka ia sagu vothung ulue anga, akennga ini silal a God. Maken toko e aka i panes vothung ulue anga ranga ve aka i panes ithanga, akennga i velpol ini a God ile ngarang. ⁵ Naro thomu o mothong tova lomumu ve, riong aka God ile erere i ri nge kene ini ur polpolnga, aka i ri vene: “God ilemi i engeng rintet nge ioni aka i pango i a it nge.” ⁶ Aveto God ile themosaling aka i sungu i a it nge, kene i engeng rintet. Maken God ile erere i ri vene,

“Na God i paesu areko o paesa oion roro.

Aveto i sungu ile themosaling

nge areko o paruru or.” *Gutpela Sindaun 3:34*

⁷ Maken aro thomu o paesu thomu ruru a God isa thewo. Aro thomu o mothong a Satan ile tongporumongre, maken aro i lo lelpot thomu.

⁸ Aro thomu o eso totho a God nge, naro i eso totho a thomu nge. Na i sivenga aka aro thomu toko le vothung kerengare aro thomu o pariri thomu. Na thomu toko lemi aini ainingare aro thomu o eksing mo lomu lemi rumong i omoletet inga a God nge. ⁹ Naro lomumu kerere na o tang nge lomu vothung kerengare. Na thomu tokokoe areko o ngenge sise, aro lomu ngenge siseong i

eksing mo thomu o tang ol. Na thomu areko o men senu nge lomu vothung kerenga, aro thomu o mothong ol lomu men senuong aken, naro lomumu kerere ol nge lomu vothung kerenga areken. ¹⁰ Naro thomu o paesu sivengomu a Toko Pomnga itheki, aken aro Toko Pomnga aro i paesa thomu roro.

Aro te mothong tova te oma riong kerenga nge thengengerre.

¹¹ Titeikre, o mothong tova keumu paenal pel. Na aro ve toko e ikei paenal itein eve i avrum ile vothung, akennga ikei paenal nge a God ile patorong na i avrum ile patorong aken, ako kathnga i sivenga. Na aro ve ong avrum a God ile patorong venen aken, akennga wong panes i avele, aveto ong paesu patorong aken nge ako ong avrum kathnga nge ako i sivenga. ¹² Na God ienga inga ako i sung patorong a it nge me, na ienga mun inga ini riong nongpolnga ako i pavurvur aro i pamimi toko, eve i pakerenga toko. Aveto wong, wong ini ao ako ong avrum thongongomre ole vothung, e?

Te mothong tova lemire simikal a God nge ler omaing elonga.

¹³ Thomu o nongpol, thomu tokokoe areko o ri ve, “Ponange eve lelken aro te pe nge rem e ako mo te voth nge tovu po omole, naro te kath sovengalo pelie ako aro te el umtun puluanga nge.” ¹⁴ Na thomu o ri venen aken, aveto lomumu mire nge lomu mimiong ako ve, lelken aro i vava? Lomu mimiong i ranga ve ini songen ako aro i velpola na palolo avele, nako i penthal werer

mun. ¹⁵ Aveto i sivenga ako aro thomu o ri inga ve, “Tova ve Toko Pomnga i sis ve aro te oma vene, aro te mimi palolo mo aro te oma venen aken.” ¹⁶ Aveto ponange thomu o risea thomu nge lomu magoning aken, aveto riseaing areko i venen aken ini vothung kerenga. ¹⁷ Maken aro ve toko e ilemi mire nge vothung sivenga e ako i sivenga ako aro i oma i, aveto i oma i avele, akennga ini vothung kerenga re aken.

5

Panakaling a riong nge toko le urnga areko ole vothung kerenga.

¹ Thomu toko le urngare, thomu la, aro thomu o tang na o wal nge kerengaing ako aro i esa a thomu nge. ² Lomu ur elonga aro i keimu re, na omu teunongre inanre aro o atiti ir. ³ Na lomu umtun alavatharnga aka o oma i nge gol ome silva, ine lumlum aro i tea ol nge. Na ine lumlum areken ru aro i pathengalpot lomu vothung kerengare,* naro i an vustetu numu peti ranga ve ini won sesenga. Na nang le vusonga i velpol lale, ave thomu o vura vura ol nge ur elonga paen tomoalnga ol. ⁴ Na thomu o nongpol, nomenga thomu o pake toko umongare ma o lel omu ometa. Aveto thomu o ol or avele. Na o thepol vet nge ole pareking aken, ma i eso a God aka ini Pen a Urvet a punongare oa Pomnga itelinga lale. ⁵ Na nge lomu mimiong ake ru a ulue, thomu o el ur sivesivengare, na thomu o opoal

* **5:3:** Lumlum aro i pathengalpot ole vothung kerenga, eneke ole umtun i ngo polpol inga na o opoal tokokoere nge avele.

inga sivengomu nge lomu menong le sivengaing. Na thomu o paan sivengomu, mola enongomu i aolonga, mo i vengtunu ol nge nang ako aro o so rin ol thomu nge. ⁶ Na thomu o teltun toko vengvengare oa, ma o so rin polpol or, na tokokoe areken o oma ur pelie avele a thomu nge.

Aro te mit engeng, na te nong a God nge, na aro te men sial nge a Toko Pomnga ile lo wererong me

(Vonge 5:7-20)

*Aro te mit engeng na te potun matheong i
pavurvur aka la Jisas aro i lo werer.*

⁷ Maken titeikre aro thomu o men punapo inga na o el inga matheong mola i pavurvur nge a Toko Pomnga ile lo wererong me. Naro lomumu rum aka ve, toko aka i o ur elonga a ometa, i pakinkinal avele na i punapoaltun inga vit, makola i pavurvur nge aka la ometa lemia i motu ma o pavelpol ol oenanga sivesivengare. ⁸ Na thomu mun aro o punapo na o mit engeng, eneke nang aka aro Toko Pomnga i lo werer nge me, i toth me lale. ⁹ Na titeikre, o mothong tova keumu paenal pel, aro vene mo God aro i pamit thomu nge riong. Na riong nongpolnga aken, i ake i tohtuno it lale.

¹⁰ Titeikre, aro lomumu rum werer nge aka nomenga God ile riong elngare o panongpol nge a Toko Pomnga iion, na o men punapo inga nge matheong elnga, na i sivenga aka aro thomu o oma ranga ve ini or. ¹¹ Na lomumu mire aka te ri ve, sapase areko o mit engeng nge matheongre

lale. Na thomu o nongpol lale nge a Jop ile mit engengeng nge matheongre ako i velpoltun i, na lomumu mire mun lale nge ur sivenga aka Toko Pomnga i oma i a i nge tova matheong areken i vus. Maken aro lemire mire nge aka, Toko Pomnga ilemi esal rintet it na i themosal it.

O mothong tova o olotet tokokoere nge lomu riong.

¹² Titeikre, ur aolonga mun e aka aro thomu o oma i kene i vene: O mothong tova o apet Pen a Urvet iion, eve ulue, eve ur pelie mun mo aro o paengeng lomu riong nge. Aro ve thomu o ri ve, “Ena” akennga aro i mirenga aka ve, “I nunganga.” Na aro ve thomu o ri ve, “Avele” akennga aro i mirenga aka ve, “Avele” aro vene mo God aro i teltun omu.

Toko vengvenga ile nongong kene ile engengeng i voth.

¹³ Na omu anga e i voth tomo nge lemi kerereng, e? I sivenga aka aro i nong a God nge. Na omu anga e ilemi ngo senu, e? I sivenga aka aro i vo riseaing a voing a God nge. ¹⁴ Na omu anga e ini multhang, e? I sivenga aka aro ikei song lotu a mukalingare aka ole lemioong i motu, mo o es me, naro o nong ile na o taultun ini peti nge wel nge a Toko Pomnga iion. ¹⁵ Na aro ve o nong na ole lemioong omoletet inga a God nge, aro ole nongong aken aro i pamimi ni multhanginga aken, naro Toko Pomnga aro i palosa i. Na aro ve ile vothung kerenga i voth, na i pamilempot i, God aro ilemi simikal i. ¹⁶ Maken aro thomu o pamilem pel nge lomu vothung kerengare, naro

thomu o nong pel epee epeenga, maken God aro i pasenu werer thomu. Eneke toko vengvenga ile nongong, kene i engeng rintet nge ur ako i pavurvur aka aro i oma i.

¹⁷ Na Elaija ini toko neneanga ranga ve ini it. Ma i nong engeng a God nge ve aro vit i mothong tova i molu, mako vit i molu avele a ulue, nge tovu po or me na ngov or limae. ¹⁸ Lamako i nong mun a God nge, mako vit i molu mun a sepsa me ma ur oingare o plo werer mun ma o mon.

¹⁹ Titeikre, aro ve omu e i leklek nge riong nun-ganga panesnga, na omu e mun e i pavengveng werer mun i, ²⁰ aro toko aken ilemi mire nge aka ve: Aro ve toko e i pavengveng toko le vothung kerenga e nge ile leklekong aken, aken-nга i pamimi toko aken nge rinong, na God aro i pasopal ile vothung kerenga puluanga aken.

Na i re aken. I vus.

**God Ile Riong Kinnga Ponganga nge
Mangsengre Okei
The New Testament in the Mangseng Language of
Papua New Guinea
Nupela Testamen long tokples Mangseng long Niugini**

copyright © 1999 Wycliffe Bible Translators, Inc.

Language: Mangseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Nov 2022 from source files
dated 9 Oct 2020

65e1c726-2893-536b-a159-517869464e50